

四庫全書

史部

欽定四庫全書

史部
史傳三編卷五

詳校官編修臣謝振定

刑部郎中臣許兆椿覆勘

總校官知縣臣繆琪

校對官待詔臣胡士震

謄錄監生臣朱一鳴

欽定四庫全書

史傳三編卷五

大學士朱軾撰

名儒傳五

宋

謝良佐

謝良佐字顯道壽春上蔡人始務記問為該博及見明道舉史書不遺一字明道警之曰可謂玩物喪志良佐

聞語汗浹背而發赤明道乃曰即此是惻隱之心一日復謂之曰君輩相從祇學顓言語故心口不相應盍行諸請問焉曰且靜坐良佐質雖少魯然志學極篤事有未徹其顓有泚憤悱如此旣成進士又事伊川嘗別一年復至伊川問所進曰但去得一矜字爾伊川喜適朱光庭來謁伊川指謂光庭曰此人為切問近思之學及歸尹焞送之問曰何以教我良佐曰吾徒朝夕從先生見行則學聞言則識譬人有服烏頭者方其服也顏色

悅澤筋力强盛一旦烏頭力去將如之何惇歸以告伊
川伊川曰可謂良友矣良佐之學強力不倦舊苦多懼
即習於危階日作課簿記其言動視聽得禮與非禮者
以自程督與游酢呂大臨楊時同在程門號四先生而
良佐所見最為超越初授秦州教授其帥呂大忠每枉
車騎過之良佐為講論語大忠必正襟肅容曰聖人言
行在焉吾不敢不肅遷應城令立信以示之始至事煩
信既立其事頓簡是時胡安國以典學使者過之不敢

問以職事顧因介紹以弟子禮見入門見吏士植立庭中如木偶人肅然起敬遂稟學焉建中間除書局官不謁執政或勸之對曰彼安能陶鑄我自有命在初良佐未及第時夢入內庭不見上惟太子涕泣及釋褐神宗晏駕哲宗嗣立每舉以告學者曰萬事有命非人力所計較必能信命方能養氣不復挫折故良佐平生未嘗干人其後召對忤旨出監西京竹木場坐口語繫詔獄廢為民在西京時朱震自太學往謁坐定震請益良佐

曰當為君講一部論語震私念日晷幾何何由得具講
說酒五行良佐掀髯曰聽講論語乃舉子見齊衰及師
冕見二章曰聖人之道無微顯無內外由灑掃應對進
退而上達天德本末一以貫之一部論語皆以此意求
及褫職歸謂學者曰學既透得名利關尚當窮理方可
望入聖域否則萬難見道吾蚤親有道復為克己之學
遂於世味若存若亡比經憂患任意益薄矣良佐為人
高邁卓絕言論宏肆善開發人所著有論語說及門人

所記語錄其以生意論仁以實理論誠以常惺惺論敬以求是論窮理命意皆極精當至直指窮理居敬為入德之門則尤得明道教人綱領其語錄則朱子少時為學實賴是編以發其趣故嘗手為釐訂云

論曰良佐之沒游酢實誌其墓當朱子時其文蚤已失之故事蹟不具夫矜者氣盈陽盈則愆陰盈則伏雖天地猶病之而況於人乎是故矜財賄者為市道矜祿位者為鄙夫矜功名者為伯術矜學識者為華

儒至若顏子之視有若無唐虞之浮雲太虛則何矜
之與有伊川以良佐為近思而明道謂其足任展拓
者以此

游酢

游酢字定夫建陽人與兄醇俱以文行知名所交皆天
下士伊川遇之京師謂其資可適道及明道知扶溝方
以倡興道學為己任設庠序聚邑人于教之乃召酢俾
職學事酢欣然從之得其微言遂盡棄其學而學焉元

豐六年第進士調越州蕭山尉縣有疑獄十餘年莫能決酢攝邑事一問得其情釋之雖明習吏事者不能逮也用侍臣薦召為太學錄除博士以奉親不便就擬知河清縣范純仁判河清待以國士純仁移守潁昌辟為府教授純仁再相除為太學博士純仁罷酢亦丐外授齊州判官丁父憂闋調泉州簽判徽宗立召為監察御史出知和州歲餘管勾南京鴻慶宮久之知漢陽軍以母老丐祠提點成都府長生觀丁母憂闋知舒州移濠

州罷歸僑歷陽因家焉酢自幼不羣讀書一過輒成誦
比壯益自力心專目到儀容詞令粲然有文望而知為
成德君子也其事親無違交友有信莅官遇僚吏有恩
人樂自盡時新法方行編民困於征歛所在騷然酢歷
知州軍處之裕如即有興建民若不知而事集故戴之
若父母去則見思伊川嘗謂楊時曰游君德器粹然問
學日進政事亦絕人遠甚其見重如此宣和五年卒年
七十一諡文肅學者稱廣平先生所著有易說詩二南

義論語孟子雜解中庸義及文集十卷

論曰游楊皆始事明道繼事伊川獨能得其宗其立
雪事學士尤所艷稱蓋事之之嚴如此純仁為一時
善類宗主而尤惓惓於酢豈虛哉純仁既不卒於用
酢猶浮沈州縣之間有若不屑去者夫存心愛物補
苴時弊以為民賜是程邵之教也及後朱子興論酢
清德重望皎如日星流風餘韻足以師世範俗云

楊時

楊時字中立先弘農人五世祖避地入閩始家將樂時
資稟甚異八歲能文丁母艱哀毀如成人事繼母尤謹
熙寧九年第進士調汀州司戶參軍不赴以師禮見程
明道於潁昌明道稱之其歸也目送之曰吾道南矣明
道卒時設位哭寢門年四十事伊川一日伊川瞑坐時
與游酢侍立不去伊川覺則門外雪深一尺矣歸杜門
種學淳涵涵浸嘗曰六經之義驗之於心而然施之行
事而順然後為得若工無用之文徼幸科第果何益哉

初明道為人溫然純粹無疾言遽色時遽似之故及二
程之門者明道最愛時伊川最愛酢其氣象實相類云
調徐州司法丁繼母憂闕改虔州獄疑立斷議事守正
不阿丁外艱闕還瀛州防禦推官知瀏陽縣厚見賓禮
於安撫張舜民漕使胡師文惡之誣以他事坐銜替舜
民入長諫垣薦之除荆南教授知餘杭縣轉南京宗子
博士出知蕭山縣所至有惠政既去而民思之不求聞
達而德望日重四方之士不遠千里從之游號曰龜山

先生父之提點均州明道觀成都國寧觀例罷差監常
州市易務而時年已幾七十矣是時蔡京當國天下多
故京知事必敗稍欲引用老成會路允迪使高麗還言
國主問龜山先生安在乃召為祕書郎到闕遷著作郎
入對首言自熙豐元祐分為二黨縉紳之禍至今未艾
願詔有司條具祖宗之法有宜於今者舉而行之當損
益者損益之元祐熙豐姑置勿問又乞警戒無虞為宣
和會計錄以周知天下財物出入之數徽宗首肯之除

通英殿說書於是方圖燕雲虛內事外時乃陳時弊十餘事且言燕雲之師宜退守內地以省轉輸募邊民為弓弩手以殺常勝軍之勢慮都城四達無高山巨浸為阻衛士人懷異心緩急不可倚仗執政不能用其為國遠慮類此及金兵南下時益蹇蹇輸忠上言今日事勢如積薪已然當奮勵以竦觀聽若示以怯懦則事去矣請罷免夫之役及京城聚斂東南花石之害以收人心已而欽宗受禪金人日迫勤王之師四集大臣方以推

恩晉秩爭議行幸莫念軍計時請立帥以統援師引唐
九節度之敗以為鑒又言上皇禪位而宰執敘遷此何
理也主辱臣死而爭為竄亡之計陛下何賴焉童貫為
三路總帥棄軍不問故梁方平何灌皆相繼遁宜以軍
法從事貫以閹悞國今防城猶用閹人覆車之轍不可
復蹈欽宗大悅擢右諫議大夫至金人約和邀割三鎮
以去時復言河朔為國家重地三鎮為河朔要藩一旦
棄之是敵以二十州之地貫吾腹中非經遠之謀且使

勤王之師無功而去厚賜之則無名不與則生怨聞三鎮之民以死拒守若遣兵躡之使腹背受敵宜有功乞召种師道問方畧疏上欽宗下詔出師時又疏曰金人尚駐磁相破大名又挾肅王以往誓墨未乾背不旋踵吾欲專守和議豈可得乎夫越數千里造人國都危道也彼見援兵四集亦懼而歸初非愛我而割與三鎮是助寇自攻也臣謂宜以肅王為問責其敗盟李綱之罷太學生伏闕上書軍民集者數萬欽宗患之召問時時

言諸生忠於朝廷爾非有他意但擇老成有行誼者為之長即定矣欽宗曰無以逾卿即命兼祭酒於是雪王珪被誣之冤以直宣仁皇后之謗推蔡京蠹國之禍以摘王安石學術之非有旨改修宣仁謗史而黜安石從祀初時浮沈於州縣者四十七年及老居諫垣僅九十日其所論列皆切於世道如此諫官馮澥素守王氏學乃劾時罷祭酒時求去除給事中請益力遂以徽猷閣直學士提舉嵩山崇福宮又辭職名改待制高宗即位

除工部侍郎兼侍講召赴行在至則勸上興學納諫及
修建炎會計錄加恤勤王之兵連章丐外以龍圖閣直
學士提舉洞霄宮未幾告老紹興五年卒年八十三諡
文靖時仁厚寬大能容物蔬糲脆甘皆可於口未嘗有
所嗜狐貉縕袍皆適於體未嘗有所擇閒居和樂可親
臨事不動聲氣在東郡時先達陳瓘鄒浩皆以師禮事
之凡紹興初崇尚元祐學術而朱子張栻之學得程氏
之正其源皆出於時子迪力學通經亦當事伊川云

論曰名賢之澤豈不遠哉閩僻在嶠外道術之興自
龜山始當南宋時河洛關隴之間學者寥寥而閩士
相踵起推其流派之所自洪固知朱子之為功大然
後海先河則龜山之澤也方今朱子傳註立於學宮
家習戶誦凡天下人心之所以正風俗之所以醇悉
由於是以是知明道道南之指其於斯文運數昭昭
乎其先見之矣

尹焞

尹煇字彥明一字德充世為洛人初仲宣七子而二子
有名源字子漸是謂河內先生洙字師魯是謂河南先
生源生林林生煇煇少孤奉母陳氏以居年二十事伊
川嘗應舉發策有誅元祐諸臣議煇不對而去告伊川
曰煇不復應進士舉矣伊川曰子有母在煇歸告其母
母曰吾知汝以善養不知汝以祿養伊川聞之曰賢哉
母也自是終身不就舉煇性鈍其從伊川與張繹同時
繹高識而煇篤行伊川問煇度與繹孰愈煇曰繹穎悟

疏通往往造妙至他時持守恐不及惇伊川然之大觀
中黨禍方興惇遂不欲仕而德益成同門之士尊畏之
伊川嘗喜晚得二子謂惇繹也又曰我死而不失其正
者尹氏子也伊川沒惇聚徒洛中非弔喪問疾不出戶
靖康初种師道薦之召至京師不欲留賜號和靖處士
遣歸呂好問胡安國等言惇學窮根本德備中和請加
識擢不報次年金人入洛惇闔門被害惇死復甦門人
昇致山谷中以免劉豫僭偽位聘之不從以兵恐之乃

自商州走蜀至閬得伊川易傳拜而受之止於涪涪伊
川讀易處也闢三畏六有二齋居之涪人罕識其面惇
為人端正仁實不過於心不欺闇室其於六經玩味以
索之踐履以身之涵養以成之至於下學上達無贅無
外所讀書耳順心得如誦已言天下知道者宗之紹興
四年侍讀范冲舉惇自代授左宣教郎充崇正殿說書
辭是時高宗渡江弛元祐學術之禁始召楊時寘從班
胡安國居給舍范冲朱震在講席諸公薦惇甚力六年

給煒行資遣漕臣奉詔迎之煒始就道至九江聞陳公輔攻毀程學上奏曰臣事頤垂二十年學之既專自信甚篤使臣濫列經筵所敷繹不過聞於師者舍其所學是欺君父遂留不進有詔守臣津送至國門復辭上曰煒可謂恬退矣以祕書郎兼說書趣起之入見又辭上曰朕渴卿久矣知卿之從伊川也當從卿講學不敢以有他乃就職八年遷少監未幾求去上曰煒老成人所學淵源足為矜式除直徽猷閣仍說書資善堂翊善朱

震疾亟舉煇自代上以煇微賸艱於教胄乃轉太常少卿仍說書頃之以疾在告除權禮部侍郎兼侍講時秦檜當國主和金使來煇疏諫曰前年徽宗皇帝寧德皇后崩問遽來莫究不豫之狀天下之人痛心疾首禮曰父母之讐不共戴天兄弟之讐不反兵陛下信讐敵之譎詐覲其肯和以紓目前之急豈不共戴不反兵之義乎又書抵檜曰和議若成彼日益張我日益急侵尋朶削天下有改革之憂且主上降志辱身有年矣未聞金

人悔禍還二帝於沙漠繼以梓宮崩問不詳金人籠絡之計不言可見今之上策莫如自治自治之要內則進君子而退小人外則賞當功而罰當罪使主上孝弟通於神明道德成於安疆勿以小智刁義而啗大功不勝幸甚疏及書皆不報於是固辭新命九年轉徽猷閣待制又辭且奏臣有五當去無一可留乞放歸田里先是檜見煇書疏不樂至是遂不復留以煇提舉江州太平觀十年請老轉一官致仕初伊川教人以敬為本煇請

益伊川曰主一則是敬煇受教持守深純嘗問於伊川
曰煇謂動靜一理伊川使喻之適聞鐘聲曰譬如鐘未
撞時聲固在也伊川喜比老猶手錄聖賢治氣養心之
要揭之壁間以自警十二年卒年七十二嘗言經以誦
說而傳亦以講解而陋訓經而務新奇則無所不至矣
有論語解及門人問荅傳於世

論曰聖門之聞一貫者賜以魯而賜終不及
參然則魯固勝乎易大畜曰剛健篤實輝光日新其

德匪畜不崇匪實不畜魯之質近實故古之為學修德者尚之惇之篤守師法進禮退義所造雖未及曾子要亦以魯得之張繹不幸早世使天假之年庶幾與聞性道之要然而尹子淵確矣

張繹

張繹字思叔河南壽安人家微賤年長未知讀書為人傭作一日見縣官出入傳呼道路頗羨慕之問人何以得如此曰讀書所致耳繹始發憤從人受學執勞苦之

役遂能文入縣府學被薦而自悟科舉之學不足為也
見僧道楷悅其道有祝髮從之之意時周行已官雒中
謂之曰子它日程先生歸可從之學無為空祝髮也及
伊川歸自涪陵繹始得見年已三十矣時從學者甚衆
繹穎悟疏通伊川甚許可以族女妻之嘗曰吾晚得二
士蓋指繹與尹焞也繹讀孟子志士不忘在溝壑二句
有自得處時請問或太高伊川不荅良久曰累高必自
下又言鄒浩以極諫得罪世疑其賣直也伊川曰君子

之於人也當于有過中求無過不可于無過中求有過
嘗詬詈僕夫伊川曰何不動心忍性繹繹謝初以文聞
于鄉曲後作文字甚少伊川每云張繹樸茂其作座右
銘曰凡語必忠信凡行必篤敬飲食必慎節字畫必楷
正容貌必端莊衣冠必肅整步履必安詳居處必正靜
作事必謀始出言必顧行常德必固持然諾必重應見
善如己出見惡如己病凡此十四者我皆未深省書此
當座右朝夕視為警其篤志自勵如此伊川沒未幾繹

亦沒尹焞被召嘗曰思叔若在自當召用必能有為于世也

論曰繹初見傳呼者而羨慕是志在富貴也見禪門而願從是未能不惑于異學也乃一見伊川之後窮理造微遂為程門高弟考其生平得力在孟子志士不忘之語感而發奮則立志之功大矣

馬伸

馬伸字時中東平人也自弱冠登第不樂馳騫以階進

晦跡州縣人無知者崇寧初元祐學有禁伊川為奸人所攻朝廷下河南府盡逐學徒伸方自吏部求為西京司法曹事至則因張繹以求見初以非其時恐貽累辭之伸執贄凡十反愈恭欲先棄官而來且曰使伸得聞道雖死無憾自爾出入凡三年公暇雖風雨必日一造焉同僚相忌至以飛語中傷之不顧也靖康初樞密孫傳以卓行薦于朝召至中丞秦檜素高其節即迎辟為監察御史令人取其狀伸曰中丞取臺官但問堪不堪

無問願不願靖康之變金人立張邦昌為帝敵去滋久
邦昌恬無退避意時人皆意邦昌實預邪謀畏禍無敢
言者伸首具書請邦昌迎元帥康王書成率同院簽與
俱往相顧無一首肯伸遂以書自抵銀臺司進之吏視
書不稱臣辭不受伸投袂叱曰逆類吾今日不愛一死
正為此耳出即以繳申尚書省邦昌見書氣沮恐敗誅
乃議迎隆祐皇后為垂簾計高宗即位伸屢拜章以城
陷不能救主遷不能死請從竄削帝知其忠且有功于

國遂擢為殿中侍御史荆湖廣南撫諭以誅邦昌及其黨王時雍還臺言執政黃潛善汪伯彥不法十七事不報復上章以臣言可采即乞施行非是臣合坐誣罔大臣之罪移病待命旬日貶濮州監酒稅時用事者恚甚以濮迫金境必欲寘之死地伸襍被就道無憂懼色卒陷于死紹興初追贈諫議大夫居常晨興必整衣冠端坐讀中庸一過然後出視事自言曰吾志在行道使吾以富貴為心則為富貴所累使吾以妻子為念則為妻

子所累又曰志士不忘在溝壑勇士不忘喪其元今日何時溝壑乃吾死所也故其臨事每奮不顧身云

論曰伸之受學程門乃在崇寧禁學之後執贄十稟學三年非其志素定中大有得者能之乎及為御史以正論忤邦昌而宗室返正劾汪黃不法十七事而公論以伸惜其竟以此而獲禍也夫南渡以後宋室轉移之機全在汪黃之斥與用使汪黃果斥則內相李綱外任宗澤宋之興也決焉伸以朝聞夕死而

無恨道義所發抗節輸忠陷九死而不悔所由與孔
光張禹異矣

胡安國

胡安國字康侯崇安人始遊太學同舍靳裁之得程氏
學安國從之講論既又與楊時游酢謝良佐諸賢遊以
故聞伊洛之正紹聖四年成進士試策第一宰臣降其
等是時章惇柄政發策欲崇熙豐而安國所對無詆元
祐語故黜及哲宗諦聽稱善乃親擢第三調常州判官

改江寧推官未赴荆門帥奏為荆門教授遷太學錄丐
外除提舉湖北學事改湖南所至訪求人材咨詢利病
刺舉必由公論會舉遺逸安國以王繪鄧璋應詔或言
二人范純仁客而鄒浩所請託也蔡京故惡安國異己
不為用聞之大喜遂命湖南北提刑置獄推治卒無驗
而安國竟坐除名安國之使湖北楊時方為府教授謝
良佐為應城宰安國於此二人者質疑訪道禮之甚恭
每二人來謁辭去安國必端笏正立目送之及罷官楊

時為具朝饌蔬炙蕭然引觴徐酌清坐講論不知日之
既暮頃之臺臣為直前事復其官政和元年除提舉成
都學事以親老辭丁內艱闕召至京以疾丐歸宣和元
年除提舉江東學事未受命而父卒終喪愴然謂子弟
曰今雖有祿萬鍾將何以為遂稱疾掛冠築室塋旁勤
耕取給泊如也宣和末除屯田郎靖康元年除太常少
卿起居郎皆不就有旨趣至京以疾在告一日召見奏
曰明君以務學為急聖學以正心為要願擢名儒明於

治平之本者虛懷訪問又言紀綱尚紊風俗益衰大臣
爭競而朋黨生百執窺覷而浸潤作用人失當而名器
愈輕出令數更而士民不信若不掃除更張大勢一傾
不可復正上納之中丞許翰登對上問識安國否翰曰
自蔡京得政士大夫超然遠跡不為所汙者惟安國一
人上為之歎息除中書舍人賜三品服時耿南仲倚攀
附恩方用事聞安國語惡之讒於上不聽則諷臺諫論
之疏又不下於是安國始就職中書侍郎何栗議分天

下為四道各置都總管以衛王室捍強敵安國以為內
外之勢適平則安偏重則危今州郡太輕固宜通變然
遽以數百州分為四道則權復太重萬一抗衡跋扈號
召不至何以待之是時栗方得上心又於安國有推挽
之力見異議駭曰人言山林之士不可用信然然猶分
四道如初策惟稍割其旁縣而已是冬金人大入北道
趙野遁去為盜所殺及圍京師西道王襄擁衆不救卒
敗國如安國言李綱之罷劉珏行詞謂綱勇於報國馮

解劾之珏坐貶安國封還詞頭且言陛下欲復祖宗善政而解言祖宗未必全是熙寧未必全非陰崇王氏之學再挾紹述之議於是南仲大怒栗從而擠之安國遂出知通州安國在省甫一月多在告每出必有所論列或勸以事小姑置之安國曰事莫不起於細微今以小事不必言至大事又不敢言是無時可言也安國旣去逾旬金人薄都城上亟召還不及時從子寅在圍城中或以為言安國愀然曰主上至此人臣効忠無路敢念

子乎高宗即位召為給事中為黃潛善所沮罷去建炎三年張浚言安國可大用再除給事中安國將行先移書宰相曰朝廷欲理兵以強國而官吏不知恤民以養兵是欲稼之長而涸其水欲木之茂而去其根也行次池州聞上走吳越引疾還紹興元年除中書舍人兼侍講再辭不許入見獻時政論二十一篇復除給事上知安國深於春秋出左氏傳命點正音讀安國言春秋經世大典陛下必欲削平僭叛使亂賊不得作莫若儲

心聖經左氏繁碎不宜虛費光陰上稱善除兼侍讀專以春秋進講初秦檜為密州教授游酢過密奇其才嘗以語安國及京城破金人欲立張邦昌檜獨抗議安國聞益義之後檜歸與聞國政安國與之善是時呂頤浩自都督江上還欲傾檜未知所出或曰目為朋黨可矣黨魁在鎖闥當先去之適朝議以朱勝非代頤浩為都督安國以為不可乃改勝非侍讀安國又言朝廷以勝非處苗劉之變為能調護聖躬昔公羊氏以祭仲廢君

為行權先儒力排其說蓋權宜廢置非所施於君父臣
以春秋入侍不能與為列遂臥不出頤浩從而排之安
國遂落職是夕彗出東南檜三上章乞留安國不報諫
官江躋等亦以為言頤浩盡去躋等二十餘人以應天
變而檜亦解印去臺省一空安國天資傑出恬靜簡默
見善必為為必要其成知惡必去去必絕其根辭受取
舍必度於義燕閒獨處未嘗釋卷每晨昏子弟定省必
問所業與意合則曰士當志於聖人勿臨深以為高或

怠慢必憾額曰流光可惜毋為小人之歸既去國乃渡
南江休于衡嶽買地結廬為終焉計平居食無兼味而
奉先必豐家雖困不以告人嘗誡子弟曰對人言貧意
將何求有來學者隨資性而接之大抵以立志為先忠
信為本每曰君子愛人不以姑息故未嘗以詞色假借
於人四年春秋傳成自王安石詆春秋為斷爛朝報廢
不列於學宮崇寧間防禁益甚安國謂六籍惟此篇出
自聖手乃厲學湛思採拾辨正準之以語孟衡之以五

經證之以歷代之史研玩沈酣者三十年及得伊川所作傳其間精義若合符節者十餘事益用自信至是書就歎曰此傳心要典也蓋於克己修德之方尊君父討亂賊存天理正人心之術未嘗不屢書而致詳焉書奏御上嘉之五年除知永州辭有頃除兼侍讀未行聞陳公輔乞禁程頤學上奏曰孔孟之道不傳久矣自頤兄弟始發明之今使學者師孔孟而禁不得從頤學是入室而不由戶也自嘉祐來邵雍張載程顥及頤皆以道

德名世值王安石蔡京等曲加排抑其道不行望下禮
官議加封爵載在祀典仍裒其遺書校正頒行使邪說
者不得作奏入公輔等交章論之復除知永州辭久之
上念訓經納諫之忠進寶文閣直學士八年卒年八十
五謚文定安國性本剛急比老風度凝遠氣貌雍穆即
在疾病必飭於禮每慕諸葛亮韓琦之為人遭中原淪
沒遺黎塗炭常若痛切於其身雖數以罪去其愛君憂
國之心遠而彌篤聞有君命即通夕不寐思所以告君

者入仕四十年實歷不及六載朱震被召問出處之宜
安國曰講學論政則當誦究至於行已大致去就語默
之幾如人飲食饑飽寒溫必自斟酌不可決於人亦非
人所決也故渡江以來儒者出處合義必以尹焞及安
國為稱首侯仲良言稱二程他無所許可及見安國歎
曰始吾以視不義富貴真如浮雲者二程先生而已不
意復有斯人也謝良佐亦語人曰康侯如大冬嚴雪百
草萎死而松柏蒼然獨秀所著尚有通鑑舉要補遺及

文集行於世

卷五

論曰仲尼作春秋於人心冥昧之時二程紹統緒於
正學滅息之後皆斯道絕續之大機也王安石自負
為名世臯夔而不知二程欲行周禮而反廢春秋宜
其兆亂當時貽詒後代安國獨慨然味人之所不味
表章春秋上資啓沃又能抗正議為二程扶衛其功
甚偉昔夫子稱剛毅近仁若安國近之矣

羅從彥

羅從彥字仲素先世自豫章徙劔浦從彥自幼即不為
言語文字之學及長嚴毅清苦刻志求道聞楊時得程
氏之傳慨然慕之及時令蕭山徒步往從焉初見三日
驚汗浹背曰不至是幾枉此生時亦喜謂可與言道於
是日益親他弟子無及從彥者嘗講易至某爻時曰伊
川說甚善從彥即驚曰走洛見伊川問之歸復事時時
告之曰讀書之法以身體之以心驗之從容默會於幽
閑靜一之中超然自得於書言象意之表又曰學而不

聞道猶不學也從彥受命益自力凡事時二十餘載時
壻陳淵每造從彥必竟日乃返謂人曰自交仲素日聞
所未聞與學清節南州冠冕也旣而築室山中絕意仕
進終日端坐充然自得朱松李侗盡執弟子禮從之游
嘗採祖宗故事為遵堯錄靖康中將獻闕下會國難不
果從彥之論治曰祖宗法度不可廢德澤不可恃廢法
度則變亂之事起恃德澤則驕佚之心生又曰君子在
朝則治小人在朝則亂蓋君子常有亂世之言使人主

多憂憂則善心生故治小人常有治世之言使人主多
樂樂則怠心生故亂又曰天下之亂不起四方而起朝
廷譬人傷氣則寒暑易侵木傷心則風雨易折其論士
行曰周孔之心使人明道道苟明則周孔之心深自得
之三代人材得周孔之心而明道故視死生去就如寒
暑晝夜之移而行忠義也易漢唐以後失周孔之心不
能明道故視死生去就如萬鈞九鼎之重而行忠義也
難又曰士之立朝以忠厚正直為本正直則朝無過失

忠厚則人無怨嗟一於正直而不忠厚則漸入於刻一
於忠厚而不正直則流入於懦其議論淳正類此朱子
稱自龜山倡道東南游其門者至衆潛思力行任重詣
極如仲素一人而已晚就特科授博羅主簿年六十四
卒於官學者稱豫章先生淳祐間諡文質

論曰從彥之為河洛正傳朱子之論定矣今觀其推
言治忽之故何其明以達也當靖康時廢法度而恃
德澤退君子而進小人朝廷不正而邊陲是亟及都

城陷殉義者僅李若水一人耳推厥亂兆則由元祐之與熙豐彼此相激而不存忠厚之意也從彥所言炳若龜鑑庶幾天民先覺之亞乃竟不為世用即其書亦不及以聞於朝惜哉

李郁

李郁字光祖光澤人元祐黨人深之予以深命為叔父庭後幼不好弄坐立必莊從舅陳瑩中學踰冠謁楊時於餘杭而請業焉時奇之謂曰學者當知古人之學何

所用心學之將以何用若言孔門求仁則何為而謂之仁若言仁人心也則何者而謂之人心郁受言退求其說以進愈投而愈不合乃取論孟讀之早夜不懈龜山深許之因妻以女蓋十有八年然後渙然有得嘗曰治經讀之又讀於無味處益致思焉以至羣疑並興寢食不置乃當驟進耳郁涵養有方平居無懈容誨人無勸色於世務人情官政文法以及行陣農圃之事靡不究知紹興中以遺逸召對高宗改容傾聽補迪功郎除勅

令所刪定官以憂去服闋值秦檜用事遂築室於邑西山闔戶讀書家計屢空曠然不為意久之辟福建帥府機宜文字日訪民間利病以告其長興除之後帥欲毀民居為列肆爭未能得遂辭去帥慙謝留之卒於官年六十五所著有易傳論孟遺藁學者稱西山先生朱子為表其墓云

論曰晉杜預有言優而游之使自求之厭而飫之使自得之朱子最善其言蓋讀書之方莫過於是也觀

郁之所肆力其於甘苦生熟之候用功亦已勤矣俗
儒涉獵不耐心於溫故無居安樂玩之休而欲沛然
於行也豈可得乎

劉勉之

劉勉之字致中崇安人自幼強學日誦數千言為文滂
沛凌厲比長婦家富而無子謀歸贅於女勉之謝不受
為擇其宗屬之賢者畀之使奉先祀以鄉舉詣太學時
元祐之禁方嚴有挾其書者師生連坐罪至流竄勉之

獨陰訪伊洛之書藏之夜深乃發篋燃膏默誦涪陵譙
定嘗從二程遊邃於易至京師勉之即往叩盡得其學
本末遂揖諸生去道謁劉敞楊時皆從請業敞尤奇之
與語無所不傾盡勉之受其言歸結廬於建陽之蕭屯
讀書力穡無求於世平居嚴敬自持而接物恂恂色笑
可親臨事財處不動聲氣學子造門隨其材品示以聖
賢教學門戶終日娓娓無倦色當世賢士大夫咸高仰
之與朱松胡憲劉子翬尤相友善中書舍人呂居仁等

薦之詔詣闕既至秦檜方主和議惡山林之士不顧利害輒盡言慮有所梗乃不使見天子第令試策後省勉之知道不行即日謝歸杜門十餘載朱松病革時屬以後事勉之為經理其家教愛朱子如己子以女妻之紹興十九年卒年五十九所居有白水學者稱白水先生論曰朱子從遊三賢及訪李侗而學乃大成侗於龜山為再傳勉之身及見之而所造於侗顧若微有軒輊何歟勉之平生僅一詣闕未嘗出仕其淡泊寧靜

之概蓋君子之所養可知矣

劉子翬

劉子翬字彥冲忠顯公齡之仲子也未冠遊太學以父
任授承務郎辟真定府幕僚齡死靖康之難子翬痛憤
哀毀致羸疾廬墓三年服除通判興化軍寇楊就犯境
與郡將畫計備禦就不敢犯以疾丐祠歸自號病翁獨
居一室危坐或竟日夜嗒然無一言至聞人有片言之
善則從容咨扣必竭兩端後生來問學則隨其器識告

語成就無倦色妻死不再娶事繼母呂氏及兄子羽盡孝友間日輒一走忠顯墓下瞻望嗚咽或累日而後反子羽之子珙開夾嗜學子翬教之卒有立籍溪胡憲白水劉勉之與子翬交至相得也每見講學外無一雜言朱子父松將沒囑朱子於此三人朱子見子翬子翬告之曰吾於易得入道之門所謂不遠復者吾之三字符也初子翬喜佛學旣而讀易渙然有得以為學易當自復始嘗闢二齋以復名其東齋又為之銘以見志至是

以告朱子馬嘗作聖傳論有曰樂善如貪弭理如函聞
非如獲利捨過如遺蛻彼以日就月將為初學以真積
力久為鈍才是自誣也一日微疾即謁家廟別母氏以
書訣親朋付珙家事自指所葬處中外孤遺人人為計
久遠已乃與學徒論修身求道之要作訓誡數百言二
日而卒年四十七世居屏山學者稱屏山先生

論曰劉勉之胡憲皆受易於譙定獨子翬於易以自
得聞昔之善學聖人者莫如顏子而翼傳以復之初

文當之則子暈之三字符固即顏子之學也子暈既
字朱子而為之說曰凜乎惴惴惟顏曾是畏蓋其志
高其見卓矣

胡憲

胡憲字原仲崇安人少學於從父安國以鄉貢入太學
時方禁伊洛之學憲獨與劉勉之陰誦竊講已又學易
於涪陵譙定定謂曰心為物漬則不能有見惟學乃可
明耳憲喟然曰所謂學者非克己工夫耶自是一意下

學不求人知一旦揖諸生歸力田以養親非其道義一
毫不取從遊者日衆近臣林彥質等薦之被召以母老
辭彥質入西府又言之輒召授左迪功郎差建州教授
日進諸生訓以為己之學諸生始而笑繼而疑既而視
其所以修身事親接人無不一如其所言遂乃悅服復
延薦行程元廉節龔何俾參學政學者大化秩滿復留
者再蓋七年不徙官以母老求監南嶽以歸久之起為
福建安撫司屬與帥不合復請祠去會秦檜用事泊然

無當世念者二十年檜死乃以大理司直召未行改祕書省正字憲每論事極意顯言至於慷慨灑涕未幾金人治汴宮室憲輒言金人必敗盟請亟用張浚劉錡時二人傷於積毀未有敢頌言用之者憲疏入即求去上感其言以為左宣教郎主管崇道觀卒召浚錡以退金師憲性恬淡培養深固平居危坐植立時然後言望之矍然若槁木之枝即之溫然雖倉卒無疾言遽色人或犯之未嘗與較讀書不務自為訓說所纂論語會義行

於世三十二年卒年七十七初朱子奉父命稟學於三君子獨從憲為最久而呂祖謙林之奇魏掞之等皆憲門人也世稱為籍溪先生

論曰憲始喟然於克己其既訓人以為己克己者所以為己也無為己之志則克己之勇無克己之功則為之不實基之以予思尚絅之心繼之以顏子請事之力終之以孟子篤實輝光之盛是魯鄒之學的也

李侗

李侗字愿中延平人年二十四棄舉子業以書謁羅從
彥從彥實得程楊之傳然清介絕俗人鮮知者見侗受
業頗非笑侗若不聞從之累年受春秋中庸語孟之說
從彥好靜坐侗退亦靜坐從彥令靜中看喜怒哀樂未
發前氣象而求所謂中者久之於天下之理該攝洞貫
各有條序從彥少然可亟稱許焉侗為人勁特豪邁至
充養完粹無復圭角色溫言厲神定氣和自然之中若
有成法其事親孝仲兄性多忤獨能得其懽閨門肅穆

若無人聲而衆事自理平居恂恂若無可否而遇事一
斷以義截然不可犯生產素薄然親隣或貧不能婚嫁
輒節衣食振助之與鄉人處長者事之盡禮少者賤者
遇之以道言笑終日油油如也荅問後學隨深淺施教
而必自反身自得始故其言曰學問不在多言但默坐
澄心體認天理雖一毫私意之發亦退聽矣又曰讀書
者知其所言莫非吾事而即吾身以求之則凡聖賢所
至皆可勉而進矣若直求之文字以資誦說其不為玩

物喪志者幾希又曰講學切要淵潛縝密然後氣味深
長蹊徑不差嘗誦黃庭堅稱濂溪所謂胸中灑落如光
風霽月者以為常存此意庶幾遇事廓然其指示深切
類此侗既閒居若無意當世而憂時論事感激動人語
治道必以明天理正人心崇節義厲廉恥為先本末備
具可舉而行朱子父松與侗同事從彥雅重侗鄧迪謂
松曰愿中如冰壺秋月瑩徹無瑕松以為知言後朱子
師侗每去復來所聞必益超絕上進不已乃如此經術

通明而未嘗著書其論春秋曰春秋一事各是發明一
例如觀山水徒步而形勢不同每舉中庸未發之中謂
必體此於身實見是理若顏子之歎卓爾然後擴充而
往無所不通所居在水竹間謝絕世故餘四十年食飲
或不繼怡然自適晚二子友直信甫皆成進士試吏旁
郡更相迎養隆興元年十月閩帥汪應辰以書幣聘往
見之至之日疾作遂卒年七十一諡文靖學者稱延平
先生所傳有朱子所記延平問荅行於世

論曰主靜之旨標自濂溪非偏於靜也定之以中正
仁義則動靜該備矣然必以靜者為主是本原之學
也中庸所謂未發偏言之與已發對而專言之則天
下之大本也故曰主也主於靜以行乎動則義與正
固靜而仁與中亦不害其為靜也故曰定也羅李之
學深會乎此用能大本卓然獨得程氏之宗紫陽紹
緒其傳益彰然羅猶有絕俗之嫌李乃無復圭角豈
天稟異哉抑亦所養使然耳

胡寅

胡寅字明仲安國弟淳之子也少桀黠難制淳閉之閣閣中有雜木寅盡刻為人形安國曰是宜有以移其心乃置書數千卷其上歲餘寅誦閱盡遍稍長從侯師聖游宣和三年成進士除校書郎於是楊時為祭酒寅復稟學焉頃之遷司門員外郎金人入京師議立異姓寅與張浚趙鼎逃太學中不書狀寅之初擢第也張邦昌欲妻以女寅固却之至是邦昌偽立寅遂棄官歸高宗

駐金陵張浚薦為駕部郎擢起居郎金人南牧詔議移
蹕寅上書有曰自古中興之主克復舊物莫不本於憤
恥恨怒不能報怨終不苟已今陛下既不為迎二聖之
策又不為守中原之謀若不更輟則永負孝弟之愆常
有父兄之責人心一去雖欲羈栖山海恐非自全之計
也呂頤浩惡其切直除主管江州太平觀未幾復應詔
上十事曰修政事備邊陲治軍旅用人材除盜賊信賞
罰理財用核名實屏諛佞去奸慝不報命知永州復召

為起居郎遷中書舍人賜三品服又遷給事中時議遣使講和寅納疏切諫上深然之加獎諭焉使定不行矣適張浚自江上還以遣使乃兵家機權竟遣之寅復言今日大計惟宜明復讐之義用賢修德息兵訓民以圖北向倘或未可則堅守待時若二三其德必不能有所立寅既與浚異遂乞便郡就養除知邵州辭改嚴州尋改永州徽宗訃至朝議欲用故事以日易月寅言禮讐不復則服不除願服喪三年衣墨臨戎以化天下俄除

禮部侍郎兼侍講直學士院丁父艱去初秦檜與安國有舊及檜當國倡和作威福寅惡之與之絕檜怒乃除寅徽猷閣直學士奉祠致仕檜憾未已復坐與李光書譏訛落職責授果州團練副使新州安置聞命即日就道於謫所著讀史管見數十萬言及檜死始聽自便復其官紹興二十一年卒年五十九諡文忠所著尚有論語詳說崇正辨及斐然集三十卷學者稱致堂先生論曰張浚負一時望為國重輕然効李綱沮岳飛其

債事也大矣吾尤惜胡寅一疏幾定國是而卒撓於
浚也至檜當國又能以公義割私交失所不自悔易
名曰忠豈虛哉

胡宏

胡宏字仁仲安國之子也始事楊時侯仲良而卒傳其
父業優游衡山下餘二十年玩心神明不舍晝夜四方
從學者甚衆張栻實師事之紹興間上書論復讐大義
累數千言至曰二帝遠適窮荒辛苦墊隘其願陛下加

兵敵國心目睽睽庶幾一得生還而陛下反欲以天子之尊北面讐敵是祖宗之靈終天暴露無與復存也父兄之身終天困辱而求歸之望絕也中原士民沒身塗炭無所赴愬也陛下念亦及此乎是後上益偷安羣臣承旨爭為彌文國子司業高閌請幸太學宏移書切責之聞者歎服初秦檜與安國有舊既當國欲用宏及宏弟寧怪二人不通問貽兄寅書諷之寧乃予書但叙契好而宏書詞氣尤厲或過之宏曰恐其見召耳寧果被

召試館職除敕令所刪定官而卒不召宏及秦熈知樞
密院事檜問寧曰熈近除外議云何寧曰外議以為相
公必不為蔡京之所為也遷太常丞祠部郎官既而寅
與檜忤寧亦出為夔州參議及檜死侍臣交薦宏朝命
下而宏已病竟不克造朝而卒所著知言有曰性立天
下之有情效天下之動心妙性情之德又曰立志以端
其本居敬以持其志志立於萬物之表敬行於事物之
內而後義可精張栻稱其言約義精實道學之樞要制

治之著龜尚有詩文五卷皇王大記八十卷學者稱五
峯先生

論曰自安國以春秋專家諸子皆潛心勵學負志節
恢廓深遠建崇論宏議以消庸靡之習是有得於春
秋之旨者也宏在諸子中偉抱卓識自許尤為不偶
較其學術亦最優也

史傳三編卷五

欽定四庫全書

史部
史傳三編卷八至

詳校官編修臣謝振定

刑部郎中臣許兆椿覆勘

總校官知縣臣繆琪

校對官檢討臣溫常綬

謄錄監生臣陳廷桂

欽定四庫全書

史傳三編卷六

大學士朱軾撰

名儒傳六

宋

朱子

朱子名熹字元晦後改仲晦世婺源人居紫陽山下父松尉尤溪以建炎四年九月十五日午時生朱子於溪

南寓舍松旣遊宦入閩晚居建州故朱子為建人少時
松指天示之問曰天之上何物松異之從羣兒戲獨端
坐以指畫沙視之八卦也始授孝經一閱題其上曰不
若是非人也年十四松以不主和議忤秦檜歸病革囑
曰籍溪胡原仲白水劉致中屏山劉彥沖三人者吾友
也學有淵源吾卽死汝往事之朱子旣孤依父友劉子
羽僑於崇安遂稟學於三君子白水妻之以女十八貢
於鄉十九成進士紹興二十一年以佐迪功郎主同安

薄二十三年之任始徒步謁李侗於延平初楊時倡道東南實傳羅從彥以及於侗故朱子師之至同安職兼學事乃選秀民為講說士尊其教二十七年四考罷歸請祠明年復謁侗由是往來從之者累年精思實體所造益深明年召赴闕不至孝宗即位應詔上封事首言記誦詞藻非所以探淵源而出治道虛無寂滅非所以貫本末而立大中帝王之學必先格物致知以極事物之變自然意誠心正而可以應天下之務次言修攘之

計不時定者講和之說誤之也願閉關絕約任賢使能
立紀綱厲風俗數年之後視吾力之強弱觀彼釁之淺
深徐起而圖之三言斯民休戚係守令賢否監司者守
令之綱朝廷者監司之本今之監司無非宰相臺諫之
親舊顧陛下無從知之耳明年召對辭不許遂入見復
陳三劄大抵不出封事之意而加剴切焉是時上頗留
意老釋而宰相湯思退中和議近習曾覿龍大淵招權
故朱子以為言思退聞之不悅授武學博士待次乾道

元年促就職值洪适相復主和不合丐祠去三年除樞
密院編修待次明年崇安大饑民奪食幾挺變朱子乃
假官粟六百石貸之人賴以濟其後歲一斂散貸者出
息什二小歉弛半息甚則盡蠲之行之十有四年贏益
多遂歸元粟於官而用所贏為貸資每石止收耗粟三
升不復取息以故數十年邑無饑饉患所謂社倉者也
五年三促就職會魏掞之以論曾覿去力辭尋丁內艱
自始死至祥禫皆酌古制行之用成喪祭禮因推之冠

昏作家禮六年復召以未終喪辭七年復召以祿不逮
養辭九年上嘉其廉退改宣教郎主祠四辭逾年始拜
命淳熙二年除秘書郎再辭五年差知南康軍四辭逾
年始拜命朱子歸自同安家居幾二十年涵養充積理
明義精既至郡懇惻愛民興利除弊惟恐不及會旱講
求荒政以請於朝言無不盡或三四上得請乃已嚴隣
路遏糴之禁闕境內蓄積之實通商勸分全活至衆郡
濱大江舟艤岸遇颶多沈溺乃募饑民築隄護之民得

濟饑而舟患亦息視民如傷至奸豪撓法懲之不少貸
數詣學引士子講論已乃建周子祠以二程配又復白
鹿書院每休沐輒一至諸生質所疑誨誘不倦立學規
俾守之明年有旨監司郡守條具利病朱子上言郡縣
賦重由於供軍請覈兵籍廣屯田練民兵以省坐食之
軍使郡縣事力稍紓然後可禁其苛斂責以寬恤卒復
極論近習竊柄援引交通之弊疏入上不悅乃乞罷黜
又以人戶逃移自劾者再以疾請祠者五皆不報除提

舉江西常平茶鹽事待次尋錄掠荒勞晉直祕閣以南
康所募納粟人未受賞義不獨被恩命三辭不拜會浙
東大饑調為提舉浙東常平茶鹽事即日就道且乞奏
事之任及至闕納粟賞行乃受直祕閣入對延和殿所
奏七事辭皆剴切其一二事言災異之由與近習之弊
則手繕以防宣洩因乞推行社倉上為下其法於諸路
方拜命時即檄旁郡募米商為蠲其征及至部客米已
大集乃單車屏從按行存卹鈎訪拊問所至人不及知

官吏憚其風采至自引去所部肅然凡丁錢和買權酷役法有不便民者悉釐革之於抹荒之餘隨事經畫為經久計猶以前後所請多見抑幸而從者率稽時後事發憤抗疏言之且移書政府曰朝廷愛民不如惜費明公憂國不如愛身然財散猶可復聚民心一失不可復收身危猶可復安國勢一傾不可復振九年以賑濟勞晉直徽猷閣辭知台州唐仲友者宰相王淮姻戚也遷江西提刑未及去朱子行部至台按得其姦贓劾之時

久旱疏出而天雨淮匿不以聞朱子申章益力前後六
上淮不得已奪仲友新命以授朱子不拜請祠去淮大
憾乃用陳賈鄭丙協力以攻朱子遂肇偽學之禍於是
朱子作武夷精舍奉祠不出者七年當是時海內學者
尊信益衆十四年除提點江西刑獄辭不許明年促奏
事辭又不許值淮罷相遂力疾入奏首言刑獄輕重失
宜甚至干涉人倫亦從流宥則天理民彝幾何不至於
泯滅卒乃極言陛下天理未純人欲未盡故便嬖得被

腹心之寄柔邪得竊廊廟之權公議有時而不容說
有時而誤聽欲報讐恥而不免苟安欲養生靈而未免
愁怨願於一念之頃謹而察之果天理耶則敬以充之
而不使少有壅闕苟人欲耶則敬以克之不使少有凝
滯是行也有要於路謂正心誠意上所厭聞戒勿言者
朱子曰吾平生所學惟此四字安敢回互以欺吾君乎
及奏上未嘗不稱善時曾覲已死王抃已去獨內侍甘
昇頗預政朱子力以為言上曰為其有才耳對曰小人

無才安能動人主翌日除兵部郎未供職林栗劾之命改它部而宰相竟授以江西前命再辭除直寶文閣奉祠未踰月復召初入奏時迫於疾作口陳未盡乞具封事以聞未及上至是再辭遂併封事投匭以進凡數千言大要言天下大本在陛下一心而其急務則輔翼太子選任大臣振舉綱維變化風俗愛養民力修明軍政六者是已疏入夜漏下七刻上已就寢亟起秉燭讀之終篇明日除主管太乙宮兼崇政殿說書時上已有倦

勤意為燕翼謀益加嚮用會執政有詆道學者遂力辭
除秘閣修撰奉外祠光宗立三辭職名仍直寶文閣居
數月除江東轉運副使再辭改知漳州又再辭不許既
之任即奏除無名之賦七百萬減經總制錢四百萬加
意學校教誘諸生又揭示喪葬嫁娶之儀嚴禁男女傳
經之會俗為一變適朝議欲行漳泉汀三州經界朱子
常病經界不行聞命即訪事宜擇人物及弓量之法上
之且言必可行之說三將必至於不能行之說一既而

寓公豪右果競沮之朱子乃以地震自劾其冬有旨先行漳州經界以屆農期暫寢明歲遭嗣子喪丐祠除秘閣修撰予祠去而漳州經界竟報罷矣頃之除荆湖南路轉運使四辭三年差知靜江府廣南西路經畧安撫辭四年使者自金還言金人問朱先生安在乃差知潭州荆湖南路安撫辭不許會長沙有峒獠之擾遂拜命至則遣人曉以禍福皆降之申教令嚴武備戢姦吏抑豪民湖湘士子故知學為之崇獎教厲四方人士畢至

孝宗升遐朱子慟不自勝又聞上不任執喪中外洶洶益憂懼乞歸田里未幾趙汝愚以太皇太后詔尊上為太上皇而奉嘉王即位主喪於是汝愚相薦朱子先是彭龜年為嘉王直講因講魯莊公不能制其母云母不可制當制其侍御僕從王稱善問為誰說對曰朱熹也自後每講王必問朱子說云何而翊善黃裳亦嘗言於光宗曰欲嘉王進德修業追踪古先哲王當求天下第一流人光宗問為誰以朱子對故王之知朱子也久至

是遂首召奏事除煥章閣待制侍講朱子行且辭於道聞南內朝禮尚闕近臣已有用事者遂因辭章微辭以諷諫疏再上不許乃乞帶元官奏事首言天運艱難國有大咎然有可諉者陛下前日未嘗有求位之心今日未嘗忘思親之懷而已夫充未嘗求位之心可以盡負罪引慝之誠充未嘗忘親之懷可以致溫清定省之禮次言為學莫先於窮理窮理必在於讀書讀書之法莫貴於循序而致精致精之本又在於居敬而持志既對

面辭職名不許翌日又辭待制乞改說書上報以手札
乃拜命每進講務積誠意以平日所論著者敷陳開釋
既數次講則復編次所講成帙以進上亦開懷容納又
請不以寒暑雙隻日月並令早晚進講及瑞慶節免稱
賀皆從之時太上意未釋然上未即還大內將葺東宮
居之朱子具四事以諫不報又議承重之禮以為子為
父嫡孫承重為祖禮皆斬衰自漢文短喪天子遂無三
年之服為父且然則承重可知壽皇至性自天獨執通

喪宜著方冊為世法程間者陛下以世嫡承大統一時倉卒遂服漆紗淺黃使壽皇已行之禮舉而復墜臣竊痛之請將來啓殯發引仍用初喪之服及孝宗將祔詔集議迭毀之次初太祖尊僖順翼宣四祖之廟實奉僖祖為始祖治平間議者以僖祖無功德世數寢遠遷於夾室未數年王安石復之是時趙汝愚雅不以熙寧中復祖僖祖為然復議祧之而奉太祖為始祖朱子乃上議狀條其不可者四且擬為廟制又援伊川程子之說

以為物豈有無本而生者今日基本啓自僖祖安得謂
無功德狀上宰相持不以聞徑創別廟以奉四祖上頗
聞朱子有狀召問內殿朱子具劄及圖以進上然之命
即榻前撰內批直罷其事時策免留正擢用謝深甫等
皆以內批行之朱子懲其弊乞再令集議於是朱子議
竟不行當汝愚之謀立上也知閤門事韓侂冑用姻戚
得見太皇太后汝愚實使入白其謀事既定侂冑以為
己功居中用事汝愚方收召四方知名之士中外引領

望治朱子獨惕然以侂冑為慮既屢言於上又數白汝
愚宜酬以厚賞勿使預政汝愚性疏以侂冑為易制不
為意朱子乃因講筵復留身極言之甫退即降內批罷
侍講予宮觀汝愚袖還內批且拜且諫而內侍王德謙
徑以內批付朱子朱子遂行臺諫給舍爭疏留之不聽
乃除寶文閣待制知江陵府朱子辭且乞追還新舊職
名詔仍煥章閣待制予祠朱子既去明年侂冑遂罷汝
愚至誣以不軌謫永州朱子自以身事四朝雖退閒猶

帶侍從義難苟默乃草疏萬言極論姦邪蔽主因以明
汝愚之寃詞旨痛切諸生交諫不從蔡元定請以筮決
之遇遯之同人朱子嘿然退焚諫草自號遯翁因六辭
職名詔仍秘閣修撰是時侂冑勢益張大興偽學之禁
臺諫爭承風旨排詆萬端至欲擠之於死二年遂落職
予祠報至朱子方為諸生講論畧起視復坐講論如初
於是繩趨尺步從游之士皆屏伏丘壑依阿選懦者更
名他師甚至變易衣冠以自別非黨而朱子方講學不

休或勸以謝遣生徒者笑而不答是冬竹林精舍成率諸生行舍菜禮於先聖先師以周程張邵司馬延平七先生配五年以年屆懸車致仕六年三月寢疾猶日為諸生講太極西銘及為學之要辛酉訂大學誠意章句甲子移寢中堂諸生入問疾曰夫子之疾革矣萬有不諱當用書儀乎不允用儀禮乎亦不允然則參用之乎乃頷之遂正坐整衣冠揮婦女勿近就枕而逝是日大風拔木洪流崩崖時年七十一朱子為人色莊言厲其

行舒而恭其坐端而直閒居未明而起深衣幅巾方履
拜於家廟以及先聖退就一室几案必正書籍器用必
整倦而休肅躬瞑息休而起端步徐行飲食羹臠匙箸
各有定列中夜而寢既寢而寤擁衾默坐或至達旦閨
庭之間內外斬斬恩義之篤怡怡如也祭祀必誠必敬
少不如儀則終日不樂已祭無違禮則油然而喜死喪
之威哀戚備至飲食衰經各副其情延遇賓客稱家有
無常盡其歡於親故必致其愛於鄉閭必致其恭平居

惓惓無一念不在於國聞時政闕失輒戚然不豫語及國勢未振常感慨以至泣下然謹難進易退之節則一官之拜必抗章力辭一語不合即奉身亟去故登第五十年仕於外僅九考立朝纔四十六日道之難行也如此其後侂冑誅嘉定二年始追諡曰文所著書有易本義啓蒙著卦考誤詩集傳大學中庸章句論語孟子集註或問太極通書西銘解楚辭集註辨證韓文考異及文集一百卷所編次有語孟精義中庸輯畧孟子指要

小學通鑑綱目本朝名臣言行錄家禮近思錄程氏遺書外書伊洛淵源錄謝上蔡語錄晚復編次禮書未及成至若天文地志律歷兵機無不洞究淵微詞章字畫未嘗用意亦動中規矩可為世法著述雖多於四子尤所殫意以大學論語孟子中庸為入道之序而後及諸經所著書一字未安必反覆達旦甚至累日要求其當而後已諸生務學篤則喜見於言進道難則憂形於色講論率至夜半雖疾病支離至諸生問難脫然沈疴之

去體一日不講學則怵然以為憂。振衣而來遠自川蜀。文字之傳流及海表。至於異域亦知慕其道。竊問其起居窮鄉晚出家。蓄其書私淑諸人者。不可勝數。寶慶三年。贈太師。追封信國公。紹定三年。改徽國公。淳祐元年。上幸學。詔以周子二程子張子及朱子從祀孔子廟。李方子曰。夫子設教洙泗。以博文約禮授學者。顏曾思孟相與守之。自後正學失傳。士各以意為學。其驚於該洽者。既以聞見自矜。而流於汎濫駁雜之歸。其溺於徑

約也又謂不立文字可以識心見性而陷於曠蕩空虛
之域先生身任道統廣覽載籍取其所同而削其不合
稽其實用而剪其煩蕪參伍辨證以扶經訓而詰其舛
差大本大根固已上達究其所窮條分派別經緯萬端
無所遺漏蓋其包涵渟蓄溥博淵泉故出之若是其無
窮也

論曰夫子以贊述六經而賢過堯舜誠以萬世之君
君臣臣父父子皆夫子之力也自道學失傳周子

倡之二程子從而光大之張子邵子又裨助而引伸之而後斯道復明於世然數子於六經自伊川易傳外鮮有成書蓋至朱子而六經之學乃揭於中天即數子之所口授心承亦皆賴其尋繹表章而後學者足與有明也平生所歷諸郡政教聿張尤惓惓為其百姓請命是伊尹內溝之心也及後登朝引道格非風節嶽嶽是臯陶陳謨之義也使當時克究其用則撥亂致治興禮明樂驟帝馳王勲施爛焉何至寢微

寢滅而終以不振哉不幸小人間之遂興偽學之禍
此與孔子不遇於春秋橫遭伐檀削跡者何異然數
百年來學校所以教政俗所以理無不折中於朱子
其為萬世烈豈直不在禹下已哉

張栻

張栻字敬夫丞相浚子也以廕補官孝宗立銳志興復
浚起謫籍開府治兵乃辟栻書寫機宜文字除直秘閣
時僚佐盡一時選栻以年少內贊密謀外參庶務所綜

畫諸人皆自以為不及也間以軍事入奏因勸上稽古親賢以自輔帝異之及李顯忠兵敗湯思退申和議而盧仲賢使金於是栻復入奏帝引見上皇栻輒策金人必敗宋室必興上皇曰何哉栻曰太上仁孝上格於天又傳位聖子雖唐虞無以過而金人篡奪相仍無復君臣父子臣以知其然也上皇曰苟仲賢使歸事當若何栻曰臣父浚職在邊隅戰守是務此事惟廟堂審處之勿貽後悔仲賢歸辱命栻劾之奪三官未幾浚去國遂

罷兵金人乘間入淮甸中外大震思退襲秦檜遺策至
敕諸將毋得輒縱兵已而浚沒栳治葬畢即上言國家
與金有不共戴天之讐願繼今以往誓不言和專務自
強雖折不撓不報乾道三年用劉珙薦除知撫州未上
改嚴州入對言欲復中原之地必先得中原之心欲得
中原之心必先得吾民之心所以得之者無他不盡其
力不傷其財而已矣今日之事固以明大義為本然所
施有先後則緩急不可以不詳所務有名實則取舍不

可以不審五年召為吏部員外郎是時敵勢新弱朝議將往青陵寢有憂召兵者輒斥之栻見上上曰知敵國事乎栻曰未知也上曰金人饑饉連年盜賊四起栻曰敵人之事臣雖不知境內之事則知之矣上曰何也栻曰比年諸道多水旱民貧日甚國家兵弱財匱官吏欺誕不足倚輔正使彼實可圖臣恐我之未足以圖彼也上默然栻因出所奏疏讀曰陵寢隔絕誠臣子之至痛今未能正名仗義以伸天討而卑辭厚禮以求之其屈

甚矣而或猶以名兵為憂者亦見我未有必勝之形故也夫必勝之形在素定之日不在決機之時上悚聽政容栻復讀曰今日且當下哀痛之詔明復讐之義顯絕金人然後修德立政用賢養民選將帥練甲兵通修攘戰守為一事且必治其實而不為虛文則必勝之形隱然可見矣上深納之將除為講官會發運使史正志行均輸法盡奪州縣財賦遠近騷然栻以為言上曰正志取諸郡非取諸民也栻曰州縣財賦大抵無餘取之不

已而經費有闕不過巧為名色以取諸民耳上矍然即
詔罷之乃以栻為左司員外郎兼侍講嘗講詩葛覃進
說曰治生於敬畏亂起於驕淫使為國者念稼穡之勞
而后妃不忘織紵之事則心不存者寡矣因陳祖宗自
家刑國之美斥今日興利擾民之害上喟然曰此王安
石所以為誤國也栻在朝末期歲召對至六七勸上修
身務學畏天卹民抑僥倖屏讒諛宰相憚之而近習尤
不悅知閤門事張說者太上皇后嫺戚也驟擢樞府外

廷諱然莫敢言栻夜草疏極諫旦詣朝堂質責虞允文
且曰宦官執政自京黼始近習執政自相公始允文慙
憤不堪退則再疏又諫事乃寢然栻亦坐是逾年遂出
知袁州栻為人表裏洞然勇於從義無纖毫滯吝每進
對不以人主意為隨順上嘗歎伏節死義之臣難得栻
曰當於犯顏敢諫中求之又嘗難辦事之臣栻曰曉事
者難耳若但求辦事之臣他日敗陛下事者未必非此
人也一日肩輿出遇曾覿覿舉手欲揖栻遽掩其櫺覿

慙手不得下其峻如此淳熙元年帝念拭除舊職知靜
江府經畧安撫廣南西路始至所部荒殘乃簡州兵補
缺籍日習月按申嚴保伍法飭巉峒酋豪弭怨睦鄰毋
相賊殺奏革橫山買馬之弊六十餘事諸蠻感服善馬
爭至以治行進秩直寶文閣再任五年除祕閣修撰湖
北轉運副使即知江陵帥本路一日去貪吏十四人禮
遇諸將加恤卒伍咸勉以忠義功賞必信又劾黜縱賊
大吏募賊黨相捕告緝斬姦民之為逋藪者湖北故多

盜至是盡遁嘗捕盜數人其一北中亡奴也栻曰國家
既未能正名討賊毋使疆場之事其曲在我乃縛奴歸
之北而戮其餘以徇北人歎曰南朝有人七年二月丐
祠未報而疾革有友求教謂曰蟬蛻人欲之私春融天
理之妙因手疏勸上親君子遠小人信任防一己之偏
好惡公天下之理投筆遂絕時年四十八已而詔下除
右文殿修撰提舉武夷沖祐觀不及拜栻初事胡宏宏
一見喜曰聖門有人矣告以洙泗論仁之旨栻益奮作

希顏錄以自策後與朱子交善講習愈精所造愈純嘗
謂學莫先於義利之辨其言曰聖學無所為而然也無
所為而然者命之所以不已性之所以不偏而教之所
以無窮也凡有所為而然者皆人欲之私而非天理之
所存此義利之分也學者當立志以為先持敬以為本
而精察於動靜之間毫釐之差審其為霄壤之判則有
以用吾力矣學然後知不足平時未覺吾利欲之多也
灼然有見於義利之辨將以救過不暇由是而不舍則

趣益深理益明而不可已豈特治己之所當先施之天下國家一也王者所以建立邦本垂裕無疆以義故也霸者所以陷溺人心貽毒後世以利故也朱子每言己之學乃銖積寸累而成若敬夫則大本卓然學者稱為南軒先生

論曰朱子平生所交友最著者敬夫東萊象山三先生而已象山既同門而異戶而東萊之教先列史而後六經於博約之歸亦似不無異旨其始終若符者

惟宣公一人夫友所以講學所以輔仁漢之王貢唐
之元白情厚矣然所取不過意氣文藝之間即進乎
此者亦僅以政事節誼相鼓勵惟朱子與宣公出則
欲同行所學舉明主於三代之隆處則闡道傳心思
樹億萬世人倫之極後之交友者可以奮矣

呂祖謙

呂祖謙字伯恭右丞好問之孫也先為河東人自好問
始居婺祖謙之學本諸家庭有中原文獻之傳長從林

之奇胡憲遊既又友朱子及張栻以故學益精初廕將仕郎隆興元年成進士復中博學宏詞科調南外宗教丁母艱居明招山四方之士爭就之闕除太學博士待次例補嚴州教授復召為博士兼國史院編修官實錄院檢討官輪對首勉孝宗留意聖學且言恢復大事乞廣攬英豪使確陳經畫先後之實然後與大臣定成算而次第行之召試館職祖謙常喜陸九淵之為文而未識其人至是考試禮部得一卷曰此必江西小陸也揭

示果然人服其精鑒丁父艱闕主管台州崇道觀召為
祕書郎重修徽宗實錄書成進對言曰治道體統內外
上下不相侵奪而後安今陛下兼行大臣之事大臣亦
行有司之事外至監司守令職任率為其上所侵而不
能令其下故豪猾玩官府郡縣忽省部掾屬凌長吏賤
臣輕柄臣願陛下虛心以求天下之士執要以總萬事
之機勿以圖任或誤而謂人多可疑勿以聰明獨高而
謂智足徧察勿詳於小而忘遠大之計勿忽於近而忘

壅蔽之萌又言國家以寬大忠厚立規模以禮遜節義
成風俗此根本之深也然文治可觀而武績未振名勝
相望而幹畧未優是以事功不競今日治體固當激厲
其事功尤當愛護其根本遷著作佐郎尋兼禮部以末
疾丐祠除直祕閣主管沖祐觀以歸祖謙孝友絕人恬
淡寡欲盡言以納忠而羞為訐秉義以飭躬而恥為介
既歸乃建麗澤書院以會友講學病中猶為日記於氣
候暄涼草木榮瘁無不謹書其察物內省不以一日懈

如此病既間除著作郎兼國史院編修官不就添差
東帥議亦不就淳熙八年七月卒年四十五諡曰成祖
謙之學以關洛為宗而旁稽載籍不見涯涘嘗言道理
無窮學者先不得有自足意又曰靜多於動踐履多於
發用涵養多於講說讀經多於讀史工夫至此然後可
久可大其論史以為論一時事紀傳不如編年論一人
終始則編年不如紀傳二者皆不可廢至觀史之法於
事之利害時之禍患必掩卷思所以處之乃為有益少

卞急後讀論語至躬自厚而薄責於人猛然有省一時
意氣皆平自是終身無暴怒朱子每稱學如伯恭方為
變化氣質所講畫將以開物成務居家之政皆可為後
世法嘗就訪朱子及歸朱子送之於道祖謙欲編近思
錄因與朱子同止寒泉精舍分類抉微一月而成又嘗
修讀詩記大事記未及成考定古周易書說間範官箴
辨志錄歐陽公本末皆行於世學者稱東萊先生其弟
祖儉字子約趙汝愚得罪祖儉輒上書陳寃坐竄韶州

在謫所讀書窮理賣藥自給芒屨徒步為踰嶺計每言人因世變摧折失其素履者固不足言若意氣反有所加亦私心也其後量移高安卒從弟祖泰性疏達尚氣誼論世事無忌諱祖儉既貶祖泰嘗欲以言報國懼累祖儉及祖儉卒祖泰乃擊登聞鼓上書請誅韓侂冑坐杖一百配欽州祖泰了無懼色至府庭尹誘之曰誰教汝共為章者言之且貫汝祖泰笑曰何問之愚也吾固自期必死而可受教於人耶尹曰汝病風喪心耶祖泰

曰以我觀之今之附韓氏得美官者乃病風喪心耳尹宗室據案作色杖加毒祖泰呼曰公天族同國休戚祖泰為誰家計安危而受此毒也尹慙趣杖訖使去侂冑怒未已使人迹祖泰所在祖泰乃匿襄鄧間及侂冑誅詔雪其寃補上州文學至都卒

論曰學欲博不欲雜又曰博學而詳說之將以反說約也祖謙之學不可謂雜而終不得與朱子並稱大醇者不以反約之意求之則博即為病是故陸九淵

之學非禪也而徑約之弊多祖謙之學非霸也而驚博之心勝惟求約於博反博歸約斯孔顏黌學之宗也

陸九淵

陸九淵字子靜撫州金谿人四歲時問父賀天地何所窮際賀笑不答九淵窮思至忘寢食及壯角聞人誦伊川語輒怵然深省曰自覺若傷我者與兄九齡相踵成進士互為師友追琢講貫和而不同九齡字子壽當秦

檜時無道程氏學者而九齡獨尊其說與九淵同為當時所尊號江西二陸二陸之學務窮本原不為章句訓詁惟孔孟是崇是信久之九齡調桂陽軍教授以親老道遠改興國未上會湖南茶寇剽廬陵鄉衆欲奉九齡主義社以備寇門人不悅九齡曰古者征伐公卿即為將帥文事武備一也遂領其事調度屯禦皆有法及至興國不以職閒自佚益嚴規矩肅衣冠如臨大衆綏勸引翼士類興起是時九淵亦調靖安主簿以繼母憂兄

弟俱歸既闕九齡除全州教授未上得疾卒年四十九
諡文達而九淵除為崇安主簿以史浩薦召審察不赴
侍從復薦之除國子正轉敕令所刪定官九淵少聞靖
康間事慨然有感於復讐之義至是乃訪求智勇之士
與議大畧益知武事利病形勢要害人物短長未幾因
輪對陳五論詞旨甚美上皆稱善除將作監丞為給事
中王信所駁主管台州崇道觀以歸貴溪有山形如象
九淵登而樂之結茅其上自號象山翁四方學徒大進

每開講席戶外屨滿耆老扶杖觀聽嘗謂學者曰平時
雖號為士人其實何曾篤志於聖賢事業往往從俗浮
沈與時俯仰徇情縱欲汨沒而不能自振日月逾邁而
有泯然與草木俱腐之恥於此能有媿懼大決其志乃
求涵養磨礪之方見善則遷有過則改無不有益者又
曰汝耳自聰目自明事父自能孝事兄自能弟本無欠
缺不必他求要在自立而已或勸以著書曰六經注我
我注六經於是朱子方知南康軍修復白鹿書院聚學

徒教育其中九淵過之朱子率僚友延登講席九淵乃
講喻義之旨懇到敷暢聽者莫不竦然動心朱子為之
避席稱謝以為切中隱微深痼之病焉其畧曰學者當
辨其志人之所喻由其所習所習由其所志志乎義則
所習者必在於義所習在義斯喻於義矣志乎利則所
習者必在於利所習在利斯喻於利矣故志不可不辨
也科舉取士久矣為士者以此相尚汨沒而不能自拔
則其志之所鄉有與聖賢背而馳者矣推而上之則又

惟官資崇卑祿廩厚薄是計豈能悉心力於國事民隱以無負於任使之者哉誠能深思是身不可使之為小人之歸其於利欲之習怛焉為之痛心疾首專志乎義而日勉焉博學審問慎思明辨而篤行之由是而進於場屋必皆道其平日之學而不詭於聖由是而仕必皆供其職勤其事心乎國心乎民而不為身計得不謂之君子乎光宗立差知荆門軍荆門在江漢間南捍江陵北援襄陽東護隨郢西當光化夷陵之衝舊無城壁九

淵請於朝而城之召集義勇優給庸直躬自勸督役者
樂趨力竭工倍二旬訖築自是邊防益固因罷關吏譏
察而減其稅商賈畢集稅入日增其為政凡訟訴無蚤
暮皆直造庭下令自持狀以追被訴者無不應期至其
有干涉人倫輒使自毀狀以厚風俗於境內官吏貪廉
人民善惡靡不周知有訴盜竊而不知其主名者九淵
出二人名捕訊之即伏盡得所竊還訴者因語吏某所
某人為暴翌日有訴遇掠者即其人也乃加追治吏大

驚以為神中嚴保伍法盜發即禽未嘗逸一人羣盜屏
息每旱出禱輒雨郡人異之期年政行令修民俗為變
諸司交薦一日語所親曰先教授兄有志天下竟不得
施而歿今吾亦將死矣又語僚吏曰某將告終然猶出
禱雪翌日雪乃沐浴更衣端坐後二日日中而卒年五
十四諡文安初九淵與九齡嘗與朱子會於鵞湖辨論
所學其後九齡深知舊見之非幡然求益惟九淵終始
自信持論不移於太極無極之說與朱子往復頻數而

卒不合學者稱為象山先生

論曰朱陸之異同五百年來儒者以為口實然考鵝湖之爭朱子年四十六而陸子乃三十七耳其未即為終身定論也豈特陸哉鵝湖所講其言不傳然陳傅良以為刻畫深而傷易簡矜持過而涉吝驕則意皆有未概於學徒之心者故朱子和章特交勗於遠密深沈之旨良有以也逮後朱子年彌高學彌進卓然為百世之師遂令儒術有所統壹向使陸子克躋

上壽探蹟研精去罅歸醇又惡知不卒於合耶以陸
子高明之資持守之篤學者不知所以服膺而誦法
之而徒執其一時之抵牾紛紛置喙於異同之間是
豈善自得師者乎

史傳三編卷六